

**REGIONAL NEWS BULLETIN
HEADLINES (EVENING)**

Date – 28/09/2024

Time - 18:30 Hrs

1. Ni 2 awh Commonwealth Parliamentary Association India Region, zone-III, Annual Conference vawi 21-na chu vawiin khan Aizawlah khar a ni.
2. Lok Sabha Speaker Om Birla chuan Aizawl Mission Venga faina hnatlang a telpui.
3. President Draupadi Murmu-i chuan thudik huai taka sawi ngam chu ukil te tan chak leh zualna a ni a ti.
4. Prime Minister Narendra Modia chuan naktuk Pathianni chawhma dar 11 khian Akashvani ah Mann Ki Baat programme a hmang leh dawn.

<><><>

CPA

Commonwealth Parliamentary Association (CPA), India Region, zone-III, Annual Conference vawi 21-na ni 2na chu vawiin khan Assembly Session Hall-ah chhunzawm a ni a,

CPA, India Region, Zone- III Chairman Pu Sharingain Longkumar, Nagaland Legislative Assembly Spekaer kaihhruaia inkhawm ah hian Project hrang hranga ruahhmanna leh thawhhona tha zawk a awm theih nan DoNER Ministry leh NEC chhunfin chungchang sawihovin India-ASEAN Vision for Trade and Cooperation hnuai Northeast Region tel ve dan tur chungchang ngun taka a ngaihtuah hnuah telh ve nise an ti a. Prime Minister kaihhruai Sawrkar laipuiin Northeast Region hmasawn nana 'Act East Policy' a kalpui chu tha tiin, hemi tichaka hmalakna zau zawk nein a nih theih nan Northeast Region chu India-ASEAN bilateral trade agreement-ah telh a, International Border a neihte chhawr tangkaia India ram thanna tha tichaktu a nih theih nan hmalak ni se an ti a ni.

India -Myanmar - Thailand Highway leh Kaladan Multi Modal Transit Transport Project-te zawhfel thuai tura hmalakte, International Trading outpost neih mek Moreh (Manipur), Zokhawthar (Mizoram) Pangsha leh Avangkhu (Nagaland) leh Pangsung Pass (Arunachal Pradesh) leh a dangte pawh thumchak ni se tih a ni a. Northeast Region chu khualzin hip kawnga theihna nasa tak nei, hnam ziarang leh nunphung hrang hrang awmna a nih avangin hemi chawilar leh hmasawna ruhrel siam kawngah theihtawp chhuaha hmalak nise tih a ni a, hmun tin tuama eizawna siam tura tanlak nise tih a ni a. Northeast Region leh ASEAN ramte inkarah insumdawna leh thawhhona tha zawk siam a nih theih nan Cultural Exchange Program pawh siam tura hmalak nise an ti baw.

21st Commonwealth Parliamentary Association India Region Zone -III kharna inkhawm hi chawhnu lamah neih zui a ni a, Chief Minister Pu Lalduhoma pawh a tel a ni. Thu sawiin Chief Minister chuan, DoNER leh NEC chhunfin an nih chuan chak leh zualin hmarchhak bialte mamawh a puhruk theih zawk a rinawm, a ti a. Bana Kaih Scheme hmanga Viksit Bharat 2047 tihhlawhtling tura hma lak an tum dan tarlangin, he scheme a hlawhtlin theih nan hian DoNER leh NEC te thawhpuiina Mizoramin a mamawh thu a tarlang a. NEC a lo changtlun leh zual theih nana rawtna a neihte a sawi baw.

<><><>

GOVERNOR ADDL CHARGE

Mizoram Larsap Dr Hari Babu Kambhampati damloh avanga a inenkawl chungin Governor hna hmui turin Tripura Larsap Pu Indra Sena Reddy Nallu chu ruat a ni a, thawhtanni chawhma dar 10 ah Governor thutiam a la ang.

President Pi Droupadi Murmu-in hemi chungchang hriattirna Rashtrapati Bhavan atanga a tichhuahah Mizoram Larsap Dr Hari Babu Kambhampati an chawlh a lak chhunga lo thawk lailaw turin Tripura Larsap ni lai a ruat a,

Puan tawh angin Dr Hari Babu Kambhampati hi a dam sam loh avangin tun thla ni 10 khan Hyderabad-a Star Hospital ah admit a ni a, Doctor ten a hriselna dinhmun an enfiah hnuah chuap lamah harsatna a nei tih hmuhchhuah a ni.

<><><>

LS SPEAKER

Lok Sabha Speaker Om Birla chuan Aizawl Mission Venga faina hnatlang a telpui a,

Sorkar laipui ruahmannaa faina beihpui thlak mek, Swachhata Hi Seva hnuaiiah Mission Veng Local Council in veng chhung tihfai hnatlang an ko a, Pu Birla hian kopanga hnim te pawt faiin hun a hmanpui ve a ni.

Commonwealth Parliamentary Association hmang tura lokal Lok Sabha Speaker hian vawiin khan Aizawl Chanmari Bazar a tlawh a, hetah hian thlai zuartute kawmin an thlai zawrh hrang hrang te a en pui a, Bara Bazar a Mizo thilsiam hrang hrang te a en hnuah khumbeu leh thildangte a lei a, UPI payment hmangin a leina hman pawh a pe nghal a, pawisa fai hmang lova hetiang internet kaltlanga thil lei hi digital India siam tura hmalakna a ni a, tualchhung thilsiamte hlut a pawimawhna a entir bawk a ni.

Hetianga khawpui chhunga a tei kualnaah hian Speaker hi mi engemawzatin thla te an lakpui a, kalkawnga chawhmeh leh thei zuar te pawh a be kual nghal bawk a ni.

Lok Sabha Speaker hian vawiin vek khan Falkawn-a Zokhua tlawhin hemi hnu hian Falkawn khua ah hun a hmang a, vawiin vek khan Delhi lam panin a haw a ni.

<><><>

WORLD RABIES DAY

Khawvel hmun dangte rualin vawiin khan World Rabies Day pualin Health Minister Pi Lalrinpuii hovin Aizawlah 'Breaking Rabies Boundaries' tih thupui hmangin hun hman a ni.

He hunah hian kum 2030 ral hma ngeia ui a hri umbo tura hmalakna 'State Action Plan for Rabies Elimination (SAPRE)' chu khuallian Health Minister-in a tlangzarh nghal a; heti hian Mizoram, Tamil Nadu leh Meghalaya-te chu India rama State Action Plan for Rabies Elimination tlangzarh hmasa ber an ni.

Pi Lalrinpuii chuan hmalakna tur chuan State chhunga ui a hri umbona kawnga hmalakna a tihchak lehzuul ngei a beisei thu a sawi a. Mizote chu ran ngaina tak anni tih sawiin khawtlang nunphung, eizawna leh nitin khawsaknaah rante'n hmun pawimawh tak an chan thu sawiin Ram hmasawn zelah ui breed hrang hrang a awm zel a, chhungkaw member ang hiala ngaih ni mah se, pawnlam mite tana hlauhawm leh harsatna thlentun nih loh nan a enkawl zui kawngah tanrual a ngai a, ui huaisar leh kawlhthe ven uluk a ngai hle a ti a, Damdawiin hrang hrangah seh avanga hridanna la tam tak an awm thu sawiin, ui a seh avangin khawvel pumah kumtin mi 56000 chuangin an thihpui thin thu leh, India ramah pawh kum tin mi 20000 chuangin an thihpui thin thu a sawi bawk.

Health Minister chuan World Health Organisation hmalakna 'One Health' concept chu nasa lehzuala kalpui leh inhrilhriat tam a pawimawh thu sawiin, WHO, FAO leh OIE te'n kum 2030 ral hma ngeia ui seh atanga natna kai avanga thihna thleng thei tihreh tuma hmalakna an nei chu tha a tih thu leh, hemi tihlawhtling tur hian NHM hnuaiiah National Rabies Control Programme (NRCP) chak taka kalpui a ni chu lawmawm a tih thu a sawi a. Rabies control programme hnuaiiah Health Department leh Vety. Department-te thawhdunna fakawm a tih thu sawiin, ui seh atanga natna kai avanga mihring thihna thleng thin umbo turin hemi kaihhnawih Sawrkar Department leh NGO hrang hrangte inkarah thawhhona tha tak a awm zel a beisei thu a sawi bawk.

<><><>

COW PROTECTION RALLY FACES OBJECTION

Hindu pawl pakhat Shankaracharya of Jyotirmath Peeth in Mizorama Bawng talhlo tura beihpui thlak an rawn tum chu Mizo Zirlai Pawl atanga dodalna a nasat avangin nimin khan Lengpuiah Private thlawhna hmanga anlo tum hnuah an thlawk let leh nghal.

MZP thuchhuah tarlan danin an duh loh zia thuchhuah an siam avang leh, an dodal dawn tih an hriat avangin an thlawk let leh an ti a, Hnam dang pawl thenkhatin, Mizoram chhunga bawng talh lo tura mipui hrilhriatna beihpui thlak an tum chu MZP in a pawm ngai dawnlo an ti a, Hnam nunphung khawih thei inzirtirna neih an tum chu MZP in nakin zel atan a him an ring lo tih sawiin an chet dan uluk takin a chhui zui zel dawn a ti a, Mizo mipuiten hetiang kawnga hmalakna awm thei lakah fimkhur a, bengkhawn lo turin an ngen nghal a ni.

Shankaracharya Pawlte hmalakna hi, MZP in NESO a a thawhpui pawl, North East-a zirlai pawl hrang hrang; Khasi Students' Union leh All Arunachal Pradesh Students' Union te pawhin an dodâl a ni.

<><><>

SWACHHATA HI SEVA

Swachhata Hi Seva puala faina beihpui kalpui mekah sawrkar pisa leh zirna in hrang hrangah Faina hnatlang neih mek a ni a, Vawiin khan District hrang hrangah pawl leh sawrkar department hrang hrangin an pisa leh a chhehvel ti faian an hnatlang.

Lunglei ah chuan UD&PA Department Lunglei, Lunglei Municipal Council leh Lunglei District Sainik Welfare & Resettlement Office bakah Mizoram Ex-Services League Sub-Headquarters Lunglei tang ho chuan Lunglei khawpui chhunga awm, indonaa ram tana nun hlante hriat rengna lungphun, War Memorial Lunglei hmunhma leh a chhehvel tifaiin an hnatlang a,

Lawngtlai ah chuan Electric Veng Village Council ten Faina Hapta hawngin veng chhungah hnatlang an nei zui a, kawng ko leh Lungrem te, tuihawk luankawr leh then fai ngai ngaimawhawm laite an thianfai a ni.

Sorkar laipui Ministry of Information and Broadcasting hnuai a awm Central Bureau of Communication (CBC) Field office, Aizawl chuan vawiin khan Gyanjyoti Foundation Skill Development and Training Centre, Chawlhmunah faina beihpui thlakna 'Swachhata Hi Seva' leh thing phun beihpui thlakna 'Ek Pek Maa Ki Naam' pual hian hun an hmang bawk.

<><><>

PRESIDENT

President Draupadi Murmu-i chuan thudik huai taka sawi ngam chu ukil te tan chak leh zualna a ni a ti. Vawiina NALSAR University Convocation vawi 21 na Hyderabad-a a hmanpuinaah he thu hi sawiin Pi Murmu-i chuan mi hnuaihning zawkten rorelna dik an chan theih nana thawh chu a pawimawh thu a sawi a. Vawiina pass chhuak zingah mipa aia hmeichhiaian an ti tha zawk chu lawmawm a tih thu a sawi a. Tunhnaia hmeichhiate chungah hleilenna thleng thin chu pawl a tih thu tarlangin mitin thawkhoa he pawikhawihna hi tihrem a ngai a ti a. Zirlai kalkhawmte chu ramtana tha ber tura hnathawk turin a sawm bawk a ni. President Murmu-i hian zirlai ti tha zualte hnenah gold medal a hlan a. Vawiin Convocation ah hain Telangana Governor Jishnu Dev Verma, Telangana Chief Minister Revant Reddy leh mi paiwmawh dangte an tel a ni.

<><><>

INDIA HITS BACK AT PAKISTAN

UN General Assembly-a Pakistan PM Shehbaz Sharif'a'n Jammu and Kashmir chungchang a sawilang chu India chuan na takin a chhanglet. Pakistan thusawi hi chhangletin UN-a India palai Bhavika Mangalanandan chuan Pakistan chu sipai te thuneihnaa kaihhruai, khawvel pumin firfiakte chetna hmun nia an hriat, ruihhloa sumdawna hmun leh ramdanga pawikhawih thinte inkulhna a ni a ti a. Hetiang ang ram tlaktlai lo takin khawvela democracy ram lian ber a bei ngam chu zahthlak a tih thu a sawi a. Pi Mangalandan chuan khawvelin Pakistan chu ramri kana firfiaka che thinte khawitu ram anih thu an hre vek tih sawiin hei hi a thenawm ramte beihna ralthuam atan a hmang thin a ti a. Indian Parliament a bei tawh a, sum leh pai khawpui Mumbaite, bazar hmun leh sakhaw hmun pawimawh thlengin an bei a ti a. Hetianga tharum thawhna leh pawikhawihna hrang hranga inrawlh thin ram tan tharum thawhna dem zawnga tawngchhuah ve chu lemchanna atthlak a ni a ti bawk.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>